

# Gwo jin 'Ko'd jin 'Kwar ma Buulus gom 'Kwani gi Panj **KURINTHUUUS mo**

## *Monthe Me'd mo*

<sup>1</sup> ABuulus a'di jin karu ki she/ mo goma Kristhos jin ta'da Yesus mo ki bwa ma Arumgimis mo, dhala Timuthawuus jin ta'da kam bana mo.

Eya kaniisa ma Arumgimis mo jin di'd e Panj Kurinthuuus mo nyakkaa ris uni kun dhunu ki she/ ki dhelel dhelel mo, uni 'baar mo kun 'kokin mo e Pa Akaa/iya mo.

<sup>2</sup> A 'the e um mo dhali moŋku'th is 'peni Arumgimis jin ta'da Babam bana mo dhali Tapa Yesus Kristhos mo be.

## *Mii jin 'Bor ma Buulusa 'Bor Bwa I Is mo 'Ko'di Monto'c Bwa mo*

<sup>3</sup> Mom'bor mii midi di mo goma Arumgimis mo dhali Ababa gi Tapam bana ka Yesus Kristhos mo, a'di jin ta'da Baba jin cila momiimii mo dhali Arumgimis jin ta ji gi momalasi 'baar mo tani <sup>4</sup>a'di jin malaski ana mo eya ris monto'c bwam bana mo, wakan ki ana mina mish malas uni gwansan kun 'kon si'da/ e monto'c bwa mo ki malas jin malaskunu ana ki is bana mo 'peni Arumgimis mo be. <sup>5</sup> Haali/ me'd jin pwakkunu ana isa nyor ma Kristhos ki nyanye/ mo jin 'koshki a'di mo tani wakan si'da/ eya Kristhos mo tani ana minu pwak momalas si'da/ ki nyanye/ mo be. <sup>6</sup> Wakki/ aman toju bwa mo tani a'di ta mii gom momalas bum

mo dhali bway mowoth mo. Dhali wakki/ aman malaskunu mo tani a'di si'da/ta mii gom momalas bum mo jin wana gwo um kani bwa mo ki um 'kuçki bwa mo ki 'kari'th mmo'dim 'kup mo e mo gi isa nyor yan jin nyakka'd ki kun 'koshki am mo be. <sup>7</sup> Mo ma 'teñ kapem bam mo gom um mo tani a'di molu yikin is mo haali/ aman misha ki um pwakki mo gi isa nyor baman bwa mo tani um si'da/ minu nyak momalas baman pwak mo be.

<sup>8</sup> Haali/ aman 'tena bwa jin mina umi ta pus mo, iwak mo, gom mon̄o'c bwa jin wa aman kan e bwa mo e Pa Asiyya mo haali/ aman 'kokina mo wakan ki ji uth mo mmomol to kal kun 'thir aman mo haali/ mon̄'koki/em bam muru'di us kan mo be. <sup>9</sup> Hili aman t̄oshkina ki aman bu'thkina gwon dwall jin toru 'twa/a 'cesh mmowu mo. Hili a'di yansan mmodhu aman mo mmo'koki cesh mo ki is bam mo, hili eya Arumgimis mo a'di jin 'de'kki ku gi wukin mo be. <sup>10</sup> Hili a'di 'cuçki aman mo 'peni mowu yan jin caaca kagahara mo dhali a'di midi 'cuç aman mo. Eya po/ a'di mo tani aman dhukina mo ma 'ten kapem bam mo ki a'di midi 'cuç am dok/e mo be. <sup>11</sup> Um si'da/ mini mii woth am ki mon'tho mo, wakan ki 'kwani ka ris mini mii ci mom'bor bwa i is mo apo/ gway bam mo gom mom'bor mii mo jin çikunu aman mo gom gwo ka ris jin thoçu mo goma 'tho ka ris kun 'thonu mo.

### *Mombut ma Buulus jin Dhalkunu 'Pen mo*

<sup>12</sup> Haali/ 'bam bam kun dhunu aman ki ca mo tani ta cikise/ mo be jin ta gwo jin çinu mo gom 'twa/ ma dum bam mo ki aman botkina ki mii e mony'cesh mo dhali ki nyanye/ mo tani aman miikina a'di 'kup ki um mo ki mii jin kogu mo

dhali ki mii ma gayiin mo dhali ki mii jin daru gi washila/ mo, yisa ki moyuk gi mony'cesh yan mo, hili ka 'the ma Arumgimis mo be. <sup>13</sup> Haali/ am 'kwara um gwoŋ kamu/ ka wuny is yisa, hili ki gwo jin mina umi mish deŋ e mo dhali mish 'ban mo. Aha/ ṭosha ki um mini mish a'di 'bani 'baar mo ki dhegem mo. <sup>14</sup> Me'd jin mishkina um a'di 'ban ki 'bana kamu/ mo tani ki um mini mish dhu 'ba/ ki ca mo gom aman mo me'd jin misha aman 'ba/dhu gom um mo ka tee gi Tapa Yesus mo be.

<sup>15</sup> Haali/ aha/ misha ki isi mish gana/ mo gom a'di yan mo, ki aha/ okina bwa mo mmoyaku/ i um itwa/a/ mo, wakan ki um mini ta gi bwam 'boro'd ka 'bukum 'ban mo be. <sup>16</sup> Aha/ okina bwa mo mmobuti um mo e bway pem jin yaka/ mo e Pam Makiduniyya mo dhali kulu/ i um ka nyan'ko'd mo 'peni Pam Makiduniyya mo dhali jin mina umi sus aha/ mo e bway pem mo e Pa Yahuudiyya mo be. <sup>17</sup> A/aha/ tana aman/ak bwa e mo mmo/o gwo mo ki mii to yansana? Dhali aha/ thosonkina miim pem mo me'd wathi/ gi mony'cesha jin nyon is mo mmo/o gwo mo ki: Nye dhali Yisa, ki ƙupa? <sup>18</sup> Haali/ ka jin gana/ me'd jin tan ma Arumgimis a'di isin gana/ mo tani gwom bam e um mo diki ta gwo ma Nye mo dhala Yisa mo be. <sup>19</sup> Haali/ Ya/ ma Arumgimis mo jin ta'da Yesus Kristhos mo tani a'di jin cikina aman gwo e bwam um mo tani dhali iSilwaanus dhala Timuthawuus mo dhali aha/ mo tani yisa ta gwo ma Nye mo dhala Yisa mo, hili eya Yesus mo tani isa yempa/ mo tani a'di ta gwo ma Nye mo be. <sup>20</sup> Haali/ aris gwo kun on ma Arumgimis is mo tani gamki gwom buni jin onu ki Nye e a'di mo be. A'di be ta 'pemen gwo jin

ona ana gwo ki Amen e a'di mo gom monyca ma Arumgimis mo be. <sup>21</sup> Hili a'di ta'da Arumgimis be jin ᲊelki aman sho'k mo nyakki um eya Kristhos mo dhali gwom piti jin ᲊankina a'di am mo be. <sup>22</sup> A'di karki mon'dap piti apo/ am mo dhali çiki aman Shi/in piti eya dum bam mo me'd to jin woθu/ 'twa/ mo be.

<sup>23</sup> Hili aha/ yükkina Arumgimis mo mmota aman/o gwo apo/ aha/ mo. A'di ta gwo mmo'tash um 'twa/ mo ki aha/ tukkina is pem mo 'peni mo jin migi/ 'taki yaku/ e Paŋ Kurinthuuus mo be. <sup>24</sup> Yisa mmomiina aman miin tapa apo/ mongam gwo is bum mo yisa. Aman miikina atu'c nyakki um mo gom bwanj 'kunygam bum mo haali/ um doshkin mo mmotel sho'k mo e mongam gwo is bum mo be.

## 2

<sup>1</sup> Haali/ aha/ dina gwo ibwa mo yisa mmoyaku/ ibuti um mo ki gwo jin midi ci'th uma du mo. <sup>2</sup> Haali/ wakki/ aha/ raka um cidhuwa du mo tani aja a'di midi mii aha/ ki bwam 'boro'd mo, hili a'din 'de/ jin ci'thka/ adu mowa? <sup>3</sup> Dhali aha/ 'kwarkina a'di me'd jin miikika/ mo, wakan ki me'd jin pu'dkika/ mo tani aha/ minu 'koki citha du ki uni gwansan kun mini 'taki 'koki mii aha/ ki bwanj 'kunyga/ mo. Haali/ aha/ misha ki isa dun gana/ gom umi 'baar mo ki moŋ'kuny bwam pem mo tani midi 'taki ta mon'kuny bwa gom umi 'baar mo be. <sup>4</sup> Haali/ aha/ 'kwarkina a'di i um mo 'peni bwa jin ᲊoco'd mo dhali ka du jin 'pe'd she/ mo dhali ki jabu'th jin upka/ mo e em pem mo, yisa mmorak um cidhuwa dum bum mo yisa, hili mmodhal um bway mo mmomish mo/en jin

ishki'd ka enthus mo, a'di jin takika/ mo gom um  
mo be.

*Mo ma Mure/ Miinthus jin Dhalkunu 'Pen mo  
gom A'di jin Dhaŋki Gwo mo*

<sup>5</sup> Hili wakki/ jan tal 'deŋ kamu/ rakki mo jin  
cidhuwa du mo tani a'di rakki a'di mo yisa gom  
aha/ mo, hili ki shem boç mo, – a'di yisa ta gwo  
jin onu ki 'bitha – gom umi 'baar mo. <sup>6</sup> Haali/  
gom wathin 'de/ wakan mo tani ajisa yansan jin  
dhukina 'kwani ka woho/ mo tani a'di 'kosh jwa  
mo be. <sup>7</sup> Wakan um mini 'taki mii dhal mii e i is  
mo mmotu'k mo mmodhal a'di amure/ miinthus  
piti 'pen mo dhali malas a'di mo, walla a'di minu  
kumki 'twa/a 'cesh mo ki bwa jin ditadit ki nyanye/  
mo. <sup>8</sup> Wakan aha/ yuka um mo mmo'deki a'di  
mo ki mo/en bum mo gom a'di mo be. <sup>9</sup> Haali/  
gom mii gi wakan mo tani a'di 'kwarkika/ gwo  
yan mo ki aha/ mina nyo/ um mo dhali mish gwo  
'ban mo wakki/ um ta imanha gwo e mo gom to  
'baar mo be. <sup>10</sup> A'din 'de/ yin jin mina umi dhal  
miinthus piti 'pen mo tani aha/ si'da/ mina dhal  
a'di miinthus piti 'pen mo be. A'di jin dhalkika/  
miinthus piti 'pen mo tani wakki/ aha/ dhalkina  
miinthus ma ciŋ kamu/'pen mo tani a'di dhalkika/  
mo gom gway bum mo e buŋ'kus ma Kristhos mo  
be, <sup>11</sup> mmonona Setaan 'twa/ mo 'peni mmogam  
uma du is ki me'd mo gom shi/ miim 'boro'd apo/  
ana mo. Haali/ ana yisa tana pus mo goma mak  
piti yisa.

*Mo/is jin Anankin ma Buulus mo Me'd jin Dina  
A'di e Pan Taruwaas mo*

<sup>12</sup> Ki aha/ pu'dkina mo e Pan Taruwaas mo mmoci gwom 'borga/ ma Kristhos mo tani acampur a'di ka'dkunu aha/ mo e Tapa mo be. <sup>13</sup> Dhali hili adum pem yisa mish ta gi mosi/is yisa haali/ aha/ dinaki gam akam pem ka Tiithus imun mo. Wakan aha/ bu'thkina moyam pem mo mmoya mo 'peni uni mo mmoya ki sule/ e Pam Makiduniyya mo be.

### *Mo jin Pinu Mii E eya Kristhos mo*

<sup>14</sup> Hili mom'bor bwa i is mo midi di mo goma Arumgimis mo a'di jin di'd eya Kristhos mo jin di'd mo mmoshu ana bway mo isa yempa/ mo e mompi mii e mo dhali e ana mo tani mo jin teru/ mo eya ris mo 'baar mo goma shima ƙuyga/ gi moyuk piti mo be. <sup>15</sup> Haali/ ana tana ashima ƙuyga/ jin cii mo eya Kristhos mo goma Arumgimis mo e bwaman uni gwansan kun takunu is ki me'd mo dhali e bwaman uni gwansan kun 'ce'dki sho'k mo be. <sup>16</sup> E jan 'deŋ kamu/ mo tani ashima ƙuyga/ jin ƙuiy mo 'peni wu, itan wu mo dhali e jaŋ kamu/ mo ashima kuya/ 'peni mondiki/e, itan mondiki/e mo. Kaja a'di i'koshki jwa mo gom to gwansan mo? <sup>17</sup> Haali/ aman yisa wana e ki 'kwani ka risa, uni gun lat 'kwani e gi gwo ma Arumgimis mo. Hili mmota 'kwani kun daran ki washila/ mo ki gwoŋkan ma Arumgimis mo dhali e jis/e ma Arumgimis mo tani aman ṣorkina gwo mo goma Kristhos mo be.

## 3

### *Imanmii Mii gom Gwon This jin Gamu Me'd mo*

<sup>1</sup> A/aman ṣelkina mii 'pen mo mmoha me'd dok/e ibwambori uma? Walla aman mina mii ta gi gwo

jin 'kwarkunu mo gom miim 'boron bam mo me'd unin tiya gun miin kan mowa? Walla gwo wakan 'peni uma? <sup>2</sup> Um ki is bum ta gwo jin 'kwarkunu mo mmotor miim 'boron bam mo kun 'kwarkunu mo eya dum bum mo kun minu mish mo dhali kun minu deñ e mo ki 'kwani 'baar mo be. <sup>3</sup> Dhali um toru mo ki um ta gwoñ 'kwar' pena Kristhos mo a'di jin cikina aman um mo. A'di yisa jin 'kwarkunu mo ka galama risha, hili ki Shi/in Dheleladhelel ma Arumgimis jin di ki e mo, yisa apo/ wosha pa'dga/ mo hili adum pa'dga/ gi wathimpa en'thi/ mo be.

<sup>4</sup> Jwa jin wuna amana wu i is mo tani eya Kristhos mo 'kup ka Arumgimis mo be. <sup>5</sup> Yisa mmotana aman uni kun mini 'kosh jwa mo ki is bama mmose gwoñ kamu/ i is yisa me'd jin yayi'd 'peni aman mowa. Mom bam jin 'kosha aman jwa mo tani 'peni Arumgimis mo be, <sup>6</sup> a'di jin thumki aman mo mmota ku gi mini mii to mo gom gwon this jin gamu me'd mo, yisa e gwoñkan jin 'kwarkunu mo, hili e Shi/in mo be. Haali/ gwoñkan jin 'kwarkunu mo tani a'di 'koshki'da 'kosh mo, hili Shi/in a'di ciki mondiki/e mo be.

<sup>7</sup> Dhali wałki/ mo jin 'dalu/ isi jwa mo, a'di jin cikunu jamas mo apo/ wosha pa'dga/ mo pu'dki'd mo ki mo jin mii ki ra/ ra/ mo, ki 'Kwani ma Israyiil mol bwam/e ma Musa par e mo kan gom mondhel piti mo, mmothiskina a'di e ki liw liw kansan mo tani <sup>8</sup> ata gara/ imina mo jin 'dalu/ isi jwa mo jin ta gi Shi/in mo 'taki ƙu'th is mo ki mii jin miinu ki ra/ra/ kagahara ki nyanye/ mo? <sup>9</sup> Haali/ wałki/ mo jin miinu ki ra/ra/ d'i'd mo gom mo jin 'dalu/ isi jwa mo gom miiwak mo tani mo jin 'dalu/ isi jwa mo

gi mii ma kar/e mo midi mii se ka pije/ ki ra/ra/ mo mmobol jin twa/a/ e kagahara mo be. <sup>10</sup> Dhali ka jin gana/ e shushan mii yansan mo tani mo jin mii ki ra/ra/ mo tani wara'd ki mo ma ra/ra/ jin diki pi ari shusha kamu/ mo haali/ mo ma ra/ra/ jin ta jin 'ko'd jin bol a'di e mo be. <sup>11</sup> Haali/ wałki/ a'di jin 'baarkunu mo pu'dki'd mo ki mo ma ra/ra/ mo tani a'di jin midi di kan ka go/ mo midi mii ta gi mo ma ra/ra/ kagahara ki nyanye/ mo be.

<sup>12</sup> Me'd jin tana aman gi mo ma 'ten kape/ gi wakan mo tani aman tana ku gi 'koki ju/ kagahara mo be. <sup>13</sup> Yisa me'da Musa a'di jin kumki bwam/ em piti ki burrinye/ mo, wakan jin mina 'Kwani ma Israyiil 'koki hil mo ma ra/ra/ jin midi 'baar mo me'd jin sula a'di mo. <sup>14</sup> Hili adum buni 'bi'thkin ki 'bi'th mo. Haali/ ntaga tee yansan mo tani ki uni denki gwon dhamo/ jin gamu me'd e mo tani burrinyem bwam/ em buni yansan di'd naskina/ kan ki dar gi mompe'd mo haali/ jasi eya Kristhos mo tani a'di kalki a'di mo be. <sup>15</sup> Nye, ntaga tee yansan mo me'dyin denkina uni Gwo ma Musa e mo tani burrinye/ ki kum uni adum buni 'kup mo be. <sup>16</sup> Hili wałki/ wathi/ ki tu'k mo e Tapa mo tani burrinye/ a'di pe'dkunu mo be. <sup>17</sup> Dhali shwane/ Tapa a'di ta Shi/in mo dhali mo jin dina Shi/in gi Tapa mo tani a'di idina mo kun 'konu ki 'kus mo be. <sup>18</sup> Dhali ana 'baar mo dara gi bwam/e kun kumu mo mmohilkina ana monyca gi Tapa mo dhali mondhel jin dhelu/ mo mo tani ana 'kokunu mo mmo/ak e mo e jamas piti mo 'peni monycañ 'dej kamu/ itan monycañ kamu/ mo. Haali/ monyca yansan pu'dki'd 'peni Tapa mo,

a'di jin ta Shi/in mo be.

## 4

### *Kumman To e Toŋ'kul Bwa mo jin Ta'da Je mo*

<sup>1</sup> Wakan, mmotana aman gi mii yansan mmomii mo ki momiimii ma Arumgimis mo tani aman yisa min ma dum bami ṭa'k ka lung'u'b mo yisa. <sup>2</sup> Aman dhaŋkina to shingga/ mo dhali mii gun ishuwa 'cesh mo. Dhali aman ushkina mo mmobočki mii ma mak mo walla mmolat gwo ma Arumgimis e mo, hili mmotor gwo eya tente/ gom gwoŋ gana/ mo tani aman mina dhu is bam ki ku gi ha me'd mo gom 'twa/ ma du ma ris 'kwani 'baar ka 'dete/ 'dete/ e jis/e ma Arumgimis mo be. <sup>3</sup> Dhali isi kan wakki/ gwom 'borgam bam kumu 'kup mo tani a'di kumu 'kup jasi gom uni gwansan kun 'koni mothis e mo be. <sup>4</sup> E 'kup miim buni yan mo tani arum gi mony'cesh yan jin luŋa uni mo tani dha'bki uni adum buni e mo uni gun daran gi gwo jin gamu is mo, mmonon uni 'peni mmopar moŋkush gi gwom 'borga/ e mo jin ta monyca ma Kristhos mo, a'di jin nyakki'da nyak ka Arumgimis mo be. <sup>5</sup> Haali/ gwo yan jin çina aman mo tani ta gwom bam ki is bam mo yisa, hili aYesus Kristhos jin ta Tapa mo, dhali gom miiny çinjkina/ jin tana aman ki is bam mo gom um mo tani a'di gom gway ma Yesus mo be. <sup>6</sup> Haali/ a'di ta'da Arumgimis jin o gwo mo ki: Dhalki moŋkush a'di 'twakki mondthurumi'd bwa mo, a'di jin kushki mo mo eya dum bana mo mmoci moŋkush gi moyuk gi monyca ma Arumgimis e jis/ e ma Kristhos mo be.

<sup>7</sup> Hili aman tana gi kumman to yan e ton'kul bwa mo jin ta'da je mo mmotor gwo ki mom'bi'th yan ta gummpa/ gi monyca ma Arumgimis mo dhali a'di ta jim bam yisa. <sup>8</sup> Aman to'ckunu bwa mo ka ris 'twanjkal kuku/ mo tani hili mmotha'th 'pena 'cesh yisa, am durjkurkunu adu is mo tani hili mmodirkunu aman e mo ma cis yisa, <sup>9</sup> aman 'koshkunu mo tani hili aman 'konuki dhal 'pen mo, aman dorkunu kal 'ko'da 'cesh mo tani hili aman yisa 'ce'dkunu sho'k mowa. <sup>10</sup> Isa yempa/ aman kalkina e bunjwar is bam mowu ma Yesus mo, wakan ki mondiki/e ma Yesus si'da/ minu tor eya tente/ e bunjwar is bam mo be. <sup>11</sup> Haali/ ki aman 'kona ki e mo isa yempa/ mo tani aman cikunu mo mmowu mo gom gway ma Yesus mo, wakan ki mondiki/e ma Yesus mo minu tor mo eya tente/ mo e bunjwar gi shuman is bam mo jin mishi wu mo be. <sup>12</sup> Wakan ba/ mowu miiki'da tu'c e am mo, hili mondiki/e e um mo be.

<sup>13</sup> Me'd jin tana aman gi Shi/ina 'de/ gi mongam gwo is mo me'd a'di jin di'd e a'di jin 'kwarki gwo ki: Aha/ gamkina gwo is mo dhali wakan aha/ torkina gwo mo tani, aman gara/ gama gwo is mo dhali wakan aman torkina gwo mo, <sup>14</sup> mmomish ki a'di jin 'de'kki Tapa Yesus 'peni mowu mo midi 'de'k aman si'da/ mo nyakka Yesus mo dhali sus am nyakki um mo e bunj'kus piti mo be. <sup>15</sup> Haali/ a'di 'baar mo gom gway bum mo, wakan me'da 'the mmopeperkina a'di e 'kwani ki nyanye/ki nyanye/ mo tani mo jin 'boruwa 'bor bwa i is mo minu mar is ki nyanye/ gom monyca ma Arumgimis mo be.

*Moŋ'ko ki Moŋgam Gwo Is mo*

<sup>16</sup> Wakan aman mina 'koki bił bwa ka luŋgu'b mo. Ba bungwar isa dhamom bam a'di shigkunu is mo, hili isi bwamana dum bam mo tani a'di jin yosu ki yos yos isa yempa/ mo be. <sup>17</sup> Haali/ mo jin toju bwa yansan mo jin tawasha tawash jin di'd jasi ki ari mo mo tani a'di thosonki'd mo gom aman mo monditł ki monyca jin midi di ki sule/ sule/ ya ye 'ba/ mo jin molu kar ka par mo. <sup>18</sup> Haali/ aman 'konaki hil 'kup ki to kun mishu mo, hili 'kup ki to kun 'konuki mish mo. Haali/ to gun mishu mo tani 'kon eya tente/ ki laŋ laŋ mo, hili to gun 'konuki mish mo tani uni ta to gun mini 'ko ki sule/ sule/ ya ye 'ba/ mo be.

## 5

<sup>1</sup> Haali/ aman misha ki wakki/ gu'ba'ku/ gi mony'cesh yan mo jin 'kona aman nycine/ 'ce'dkunu sho'k mo tani aman tana gi monyan 'peni Arumgimis mo, gu'b jin nyaŋu ki me'd yisa, a'di jin midi di ki sule/ sule/ e momis mo be. <sup>2</sup> E mahan ka jin gana/ mo aman ohonkina mo dhali 'kosh kwa/a/ mo mmoshum mo ki mon'kom bam e momis mo. <sup>3</sup> Wakan ki mo jin mina amani shum ki a'di mo tani aman minu 'koki gam is 'te/ mo be. <sup>4</sup> Haali/ me'd jin 'kona aman mo naskina/ e gu'ba'ku/ yan mo tani aman wukina shure/ ki mo/ anan is mo, yisa ki aman minu 'koki hi'th is ki to mo, hili ki aman minu hi'th is ki to ki nyanye/ mo, wakan ki bungwar is yan jin mish wu mo tani minu los mo ki mondiki/e yan mo be. <sup>5</sup> A'di jin thosonki aman is mo gom to yan gana/ mo tani a'di ta'da Arumgimis mo, a'di jin çiki aman Shi/in mo me'd to jin wothu/ 'twa/ mo be.

<sup>6</sup> Wakan aman isa yempa/ mo tani tana gi mo ma dunj gana/ jin 'bidhu is mo. Dhali aman misha ki me'd jin 'kona aman e mon'kom bam e bunjwar is mo tani aman si'da ki si'd 'peni Tapa mo be. <sup>7</sup> Haali/ aman iina ki mongam gwo is mo, yisa ka shureya. <sup>8</sup> Aman tana ga dunj gana/ jin 'bidhu is mo, dhali amani imina dhal mii e i is mo mmosi'd mo 'peni bunjwar is mo dhali nyak<sup>2</sup> 'ko ki Tapa mo be. <sup>9</sup> Wakan wakki/ aman nyaka 'ko mo walla si'd mo tani aman karkina a'di ki tom bam jin guna aman ki e mo mmo'bor a'di bwa mo be. <sup>10</sup> Haali/ ana 'baar mo mina mii pi mo e bwambor ma kursi ma Kristhos gi gwon dwall mo, wakan ki 'kwani ka 'dete/ 'dete/ mo mini 'taki bu'th to kun 'boron mo walla kun shiyin mo be isi me'd mii kun miikina uni ki bunjwar is mo be.

### *Miijin Miinu To mo goma Gwamjin Gwamkunu mo*

<sup>11</sup> Gom mii gi wakan mo tani mmomisha aman mii jin minu ko/ Tapa mo tani aman lalkina 'kwani sho'k ki gwo mo. Hili a'di jin tana aman mo tani a'di mish ma Arumgimis mo dhali aha/ tana ga 'ten kape/ mo ki a'di si'da/ mishu ki 'twa/ ma dum bum mo be. <sup>12</sup> Aman yisa dhuna is bam ki ku gi ha me'd mo e um mo dok/e, hili mmoci um mo jin raku mo mmodhu is ki ca mo gom am mo be. Wakan ki um mini mish thok<sup>3</sup> uni gwansan gwo mo kun dhu 'bam buni ki ca mo gom is buni mo gom monyca jin dina wathi/ nycine/ mo dhali yisa goma dum piti mo. <sup>13</sup> Haali/ wakki/ aman sona du ki is bam mo tani a'di goma Arumgimis mo be. Wakki/ aman kutha is mo ki 'cese/ 'cese/ eya dum bam mo tani a'di gom um mo be. <sup>14</sup> Haali/ mo/

en ma Kristhos mo tani a'di 'timkina amana du mo haali/ ḡaman su'kkunuwa du mo ki tal 'deñ kamu/ wu'd mo gom 'kwani 'baar mo. Wakan aris 'kwani 'baar mo wukin mo be. <sup>15</sup> Dhali a'di wuki'd mo gom 'kwani 'baar mo ki uni gwansan kun 'kon mo mini dok/e 'koki 'ko mo gom bungwar is buni mo hili gom a'di mo jin wuki'd mo gom gway buni mo dhali jin 'de'kkunu mo be.

<sup>16</sup> 'Peni mo yan shwane/ mo, ki mii gi wakan mo tani aman 'konaki nyith wathin 'deñ kamu/ 'peni ji en'thi/ mo. Isi kani ba am isa gush nyitha Kristhos mo 'peni ji wathimpa en'thi/ mo tani aman nyitha a'di wakan dok/e yisa. <sup>17</sup> Wakan be wa<sup>k</sup>ki/ wathin 'deñ kamu/ di'd mo eya Kristhos mo tani a'di ta jin this jin uku mo. Miin dhamo/ pekin mo tani dhali hili miin this uni pu'dkin mo be. <sup>18</sup> Aris uni gwansani 'baar mo 'peni Arumgimis mo be, a'di jin gwamki ana mo eya Kristhos mo ki is piti mo dhali ci ana mii ki mo gi gwo jin gwamkunuwa gwam mo be. <sup>19</sup> Gwo a'dan be. Arumgimis diki'd eya Kristhos mo mmogwamkina a'di 'kwaniny'cesh mo ki is piti mo, yisa mmodhu gwon dhañ buni apo/ uni mo, dhali dhu gwo e me'd bana mmotor mo, gwo gi mo jin gwamkunuwa gwam mo be. <sup>20</sup> Wakan ana tana iman/ ii goma Kristhos mo, haali/ mo ma Arumgimis jin yipkina a'di 'kup mo tani e ana mo be. Dhali aman yukkina um mo gom gway ma Kristhos mo be: Wari um ki ku gun gwamkin ma Arumgimis mo ma. <sup>21</sup> Gom gway bana mo tani a'di ki kar a'di mo mmota ji gi miinthus mo, a'di jin molki miinthus mo. Wakan e a'di mo tani ana minu dhuku/ mo ki ku ma kar/ e mo goma

Arumgimis mo be.

## 6

<sup>1</sup> Mmonya<sup>ka</sup> um to mii ki a'di mo tani aman malaskina um mo mmo'koki budha 'the ma Arumgimis ki pe'th mo. <sup>2</sup> Haali/ a'di oki gwo mo ki:

Ka tee jin budhuwa bu'th mo tani aha/ cikkina /e gwo mo

dhali woth/e mo ka tee gi mowoth mo be.

Dhali hili mo mo ma. Shwane/ a'di ta'da tee jin budhuwa bu'th shwane/ mo. Hili mo mo ma. Shwane/ a'di ta'da tee gi mowoth mo be. <sup>3</sup> Aman 'konaki kar tonj kola kamu/ e bway gi jan ṭal 'deñ kamu/ mo, wakan ki gwon thutha kamu/ minu 'koki gam mo apo/ miim bam jin miina am to mo be. <sup>4</sup> Hili me'd cinqina/ ma Arumgimis mo tani am dhuna is bam mo ki ku gun ha me'd mo eya ris 'twaŋkal kuku/ mo. E dhan mon'dim 'kup mo, e monṭo'c bwa mo, e miin kakga/ mo, e mii gun shi/ ashi/ mo, <sup>5</sup> e mondor mo, eya sijin mo, e mo ma dulat̄t mo, e mo ma ṭu'c jin caaca mo, e montima tim mo, en te/ mo, <sup>6</sup> ki mii gun dheleladhelel mo, ki moyuk mo, ki mo jin 'kuçu bwa ki 'kari'th mo e mo gi isa nyor mo, ki mii jin miinu ki bwaŋkush mo, dhali ki Shi/in Dheleladhelel mo, ki mo/en gana/ mo, <sup>7</sup> ki gwoŋ gana/ jin onu mo, dhali ki mom'bi'th ma Arumgimis mo, ki to/as gi mii ma kar/e mo gom me'da bim poros mo dhali me'da cam mo be, <sup>8</sup> e montak mo dhali mo jin ushuwa tak tak mo, e gwonthus jin ṭoruwa po/ mo dhali e gwom 'boro'd jin ṭoruwa po/ mo. Aman miinu me'd 'kwani gun he'kkina he'k e mo tani hili aman

tana kuŋ gana/ mo, <sup>9</sup> me'd uni gun 'konuki mish mo tani hili aman mishu mo ki 'bore/, dhali me'd kun 'kon mo e mowu mo tani dhali hili mo mo ma, aman 'kona ki e mo, me'd uni gun cikunuwa jisa mo tani hili aman 'konuki 'kosh jwa mo be, <sup>10</sup> me'd kun 'kon ki bwan diṭadit mo tani hili isa yempa/ mmo'kuny bwa mo, me'd uni kun hatha'ko'd ki ha'th mo tani hili aman miikina mii ka ris kun ta pa ki pa mo, me'd uni gun dar gi to mo tani hili aman tana ga ris to 'baar mo be.

<sup>11</sup> Twam bam ƙa'dkunu mo gom um gi Paŋ Kurinthuuus mo. Adum bam waŋgala waŋgal mo be. <sup>12</sup> Um yisa 'tashu 'twa/ ki aman mo yisa hili um i'tashu 'twa/ ka dum bum kun sicasi'c mo be. <sup>13</sup> E miim pem jin migal/ kul 'kup ki um mo tani – aha/ mina o um gwo mo me'd um ta uci mo – Wanjali adum bum si'da/ mo ma.

### *Um Ta Monyça'b ma Arumgimis jin Di ki E mo*

<sup>14</sup> Dhalku/ ki mash ki uni kun daran gi gwo jin gamu is mo ma. Haali/ mii ma ƙar/e midi nyak to mii ki to shiggal/ kata mo? Walla moŋkush midi nyak to mii ki mondhumurumi'd kata mo? <sup>15</sup> Bwa ma Kristhos midi gam me'd ki bwa ma Bali/aal mmana mo? Walla wathi/ jin gam gwo is taki'd gi to jin nyakka'd mo ki a'di jin dara'd gi gwo jin gamu is mowa? <sup>16</sup> Gwo gi wakata mina gu'b gi mondheleladhelel ma Arumgimis gam me'd mo ki ji gi luŋu tompinycon mo? Haali/ ana tana gu'b gi mondheleladhelel ma Arumgimis jin di ki e mo me'd gwo jin on ma Arumgimis mo ki:  
Aha/ mina di e uni mo dhali nyak shekem ibwa-  
man uni mo,  
dhali aha/ mina ta uni Arumgimis buni mo,

dhali uni mini ta 'kwanim pem mo be.

<sup>17</sup> Gom gwo gi wakan mo tani piyi um ka pije/ mo  
'peni uni mo

dhali dhuyi is bum ki she/ 'peni uni mo. A'di ta gwo  
jin ona Tapa mo.

Dhali dhalki to nyoggaŋ kamu/ ki ta is ki me'd mo.  
Yan'ko'd aha/ mina hayy um mo be,

<sup>18</sup> dhali aha/ mina ta um Ababa mo,  
dhali um mini ta iya/m pem mo dhali i'bwa/m pem  
mo.

A'di ta gwo jin ona Tapa mo, a'di jin ta a'di jin Eka/  
Ek mo be.

## 7

<sup>1</sup> Me'd jin takina ana gi gwo gwansan gun onu is  
mo tani um gun enu mo tani dhalki ana dhelela is  
bana mo ' pena ris mii gun nyo/i bunjwar isi 'baar  
mo dhali shi/in mo mmosus mo jin kogu ki jaro/  
jaro/ mo e moŋko/ goma Arumgimis mo.

*ABuulus 'Kunykina Bwa mo gom 'Kwaniŋ Kaniisa  
kun Ri'ckina Du Is mo*

<sup>2</sup> Ka'di adum bum gom aman mo. Aman 'konaki  
thu'th to mii e jan ṭal 'deŋ kamu/ mo. Aman 'konaki  
pu/ jan ṭal 'deŋ kamu/ mo. Aman 'konaki bu'th  
shi/ miim 'boro'da kamu/ gom jan ṭal 'deŋ kamu/  
mo. <sup>3</sup> Aha/ dinaki o gwo yansan mo mmowak  
um mo haali/ aha/ ona gwo yansan nt̄wa/a/ mo ki  
um dhuna aman mo eya dum bam mo, mmowu  
mmontal 'de/ mo dhali mmo'ko ki e e montal 'de/  
mo be. <sup>4</sup> Aha/ tana gi dhan mo jin wuka/ um jwa i  
is mo. Aha/ tana gi dhan mo jin karka/ is ki ca mo  
gom um mo. Aha/ 'tu'dkunu mo ki momalas mo.

Ki mom bami 'baar mo jin ṭoju aman bwa mo tani mon'kuny bwam pem guski'd ki sho'k piti mo be.

<sup>5</sup> Haali/ isi kani ki aman pu'dkina mo e Pam Makiduniyya mo tani bungwar is bam yisa gamki mo ma si/isa kamuwa, hili aman ṭo'ckunu bwa mo ka ris mo jin ṭuku mo, mo/as ki us mo dhali ki mon̄ko/ is e bwaman mo. <sup>6</sup> Hili Arumgimis a'di jin malaski a'di jin biṭkunu bwa ka luŋgu'b mo tani malaski aman mo gom pu'd jin pu'dkin ma Tiithus mo be. <sup>7</sup> Dhali yisa jasi gom pu'd jin pu'dkina a'di 'te/ mo, hili si'da/ ki momalas jin malaskina a'di um mo ki gwo jin ṭorkina a'di aman mo gom kwa/ am bum jin 'koshki um mo, dhali gom kom bum jin gwokina um mo, dhali gom mii jin shwa uma nyor ka nyor mo gom aha/ mo, wakan ki aha/ mina bwa 'kuny kagahara mo be. <sup>8</sup> Haali/ isi kani wałki/ aha/ raķa um mmokal bwan diti'd mo gom gwom pem jin 'kwarkika/ um mo tani aha/ yisa guna is mo gom a'di mo (ba aha/ gukina isi ṭwa/a/ mo be) haali/ aha/ nyiṭhkina ki gwo yansan jin 'kwarkika/ um mo tani jwakaṭki um mo be, bahili jasi gom ari mo mo. <sup>9</sup> Ki a'di gi wakan mo tani aha/ 'kunykina bwa mo, yisa haali/ um jwakaṭkunu mowa, hili haali/ um jwakaṭkunu mo e mo jin susu mmorica du is mo. Haali/ um suruna ki monyjwakaṭ mo jin ta a'di 'peni Arumgimis mo, wakan ki um mina isi 'koki 'kosh ka nyor gom ton̄ kamu/ jin thisu e mo gom aman mo be. <sup>10</sup> Haali/ monyjwakaṭ 'peni Arumgimis mo a'di ki wagas mo jin rijuwa du is mo jin shu'di tagi bway mo jin tanuwa ta is ki me'd jin diki sus e mo jin 'donu is mo, hili monyjwakaṭ jin ta ji gi 'kwaniny'cesh mo tani a'di wagaski mowu mo be. <sup>11</sup> Haali/ hili ma, mo jin

gwona bwa ka daran du mo monyjwakat yan jin ta ji 'peni Arumgimis mo tani a'di wagaskunu mo e um mo, mom'ba/ jin ganankina um mo mmoṭor markin bum mo ki is bum mo, mo ma nyor jin dekki um mo, dhali mo ma ayy/ayy/ayy/am bum mo, dhali monkwa/ am bum jin 'koshki um mo, dhali mii jin shwa uma nyor ki thith dhali ajisa jin gamkunu mo be. Eya ris mii jin su'kkina um mo tani um ki is bum nyo/kunu mo ki ku gun 'kona mii ki 'ko 'ba/ mo goma ris mii kun 'konu ki bath mo be. <sup>12</sup> Wakan, aha/ bala 'kwarkina gwo e um mo tani hili yisa gom a'din 'de/ yin jin thu'thki to mii mo walla gom a'din 'de/ yin jin 'koshkina is ka nyor mo gom mii jin thutha a'di mii mo yisa, hili ki mo jin shwa uma nyor ki thith mo gom aman mo jin minu 'taki tor mo eya tente/ gom um e jis/e ma Arumgimis mo be. <sup>13</sup> Wakan aman malaskunu mo be.

Dhali ki momalas ganam bam jin 'ce'du 'ba/ mo tani aman 'kunykina bwa kagahara mo e moŋ'kuny bwa ma Tiithus mo haali/ adum piti a'di sikunu is mo gom umi 'baar mo be. <sup>14</sup> Haali/ wakki/ aha/ ṭorkina a'di gwoŋ kamu/ mo gom mmokarka/ is ki ca mo gom um mo tani aha/ yisa karu ki mon'the is yisa. Hili jasi me'da ris gwo 'baar mo kun okina aman e um mo tani ta gwoŋ gana/ mo tani wakan 'bam bam jin dhuna am ki ca mo e bwambor ma Tiithus mo tani a'di nyo/kunu ki nylo/ gana/ mo be. <sup>15</sup> Dhala dum piti pu'dki'd ka piye/ 'baar mo kagahara gom um mo me'd jin kakina a'di gwom bum e jin hakina um e 'baar mo dhali monko/ jin Ɂoka/ um mo dhali adee jin deekina um mo a'di jin bu'thkina um a'di mo be.

<sup>16</sup> Aha/ 'kunykina bwa mo haali/ aha/ takina gi mo jin wuka/ um jwa i is mo jin 'boro'd ki 'bor gana/ mo be.

## 8

### *Miijin Çinu To ka 'Ka'd Me'di Is mo*

<sup>1</sup> Aman ḥapa um mmomish mo mo iwak mo gom gwo ma 'the ma Arumgimis mo jin ṭorkunu mo eya ḫaniisa 'baar mo e Pam Makiduniyya mo be. <sup>2</sup> Haali/ e mompal gi mo jin ṭocu bwa mo jin eka/ ek mo tani moŋ'kuny bwam buni jin ekki'd ki ek mo dhali moha'th'ko'd buni jin shwa'da nyor mo tani a'di guski'd ki sho'k piti mo ki pa jin tana uni ki to jin 'ka'da uni me'di is mo ki miim buni mo be. <sup>3</sup> Haali/ uni ciki to mo isi ki jim buni jin tana uni mo, me'd gwo jin mishka/ ṭor mo dhali ki tom buni jin 'ce'de'da po/ jin çina uni mo tani a'di 'peni bwam buninj gana/ mo be. <sup>4</sup> Uni 'thoki am mo ka dun dara'd mo gom mii ma 'the yan mmonyaḳ to mii mo mmowoth uni kun dhunu ki she/ ki dhelel dhelel mo. <sup>5</sup> Dhali yansan miikina uni mo, yisa me'd jin ṭoshkina aman mo, hili ntwa/a/ mo tani uni ciki is buni ki Tapa mo dhali ki aman mo ki bwa ma Arumgimis mo be. <sup>6</sup> Isi ki gwo gi wakan mo tani aman ḫirrishkina aTiithus ki gwo mo haali/ a'di telki mii 'pen mo hila/ mo tani a'di midi 'taki mii thim mii ma 'the yan e bwam um mo be. <sup>7</sup> Dhali me'd jin 'kokina um imis eya ris to 'baar mo e moŋgam gwo is mo, e mo jin onu gwo mo, e moyuk mo, eya risa du gun darkin gi dar mo, dhali e mo/ en bum gom am mo tani hili si'da/ ki um mini 'ko imis gom mii ma 'the yansan si'da/ mo be.

<sup>8</sup> Gwo yansan oka/ yisa mmokana kan mo, hili mmonyo/ mii mo ki mii gi cin tiya kun miina uni ka daran du mo ki mo/en bum si'da/ mini ta kun gana/ kun dar ki washila/ mo be. <sup>9</sup> Haali/ um mishkina 'the gi Tapa Yesus Kristhos bana mo, ba ki a'di ta pa ki pa mo tani a'di warki'd ka ha'th'ko'd gom gway bum mo. Wakan ki mo ma ha'th'ko'd piti mo tani um mini war ki uni gun ta pa ki pa mo be. <sup>10</sup> Dhali e mii yansan mo jin 'konu ki bath mo tani aha/ çikina uma yük mo. A'di jin 'boro'd gom um mo mmothim a'di shwane/ mo tani a'di jin telkina um 'pen ki yil 'de/ yin kagush mo, yisa jasi mmomii to 'te/ mo, hili mmo/o bwa mo be. <sup>11</sup> Wakan ki mo/is bum e bwa jin ona um ki mii a'di mo tani mini 'taki ta par mo ki miim bum jin thimkina um a'di mo 'peni to gun takina um mo be. <sup>12</sup> Haali/ wakki/ mo jin isu di'd mo tani a'di mishkunu bu'th mo me'd isi to gun takina wathi/ mo, yisa me'd isi to jin darkina a'di yisaa. <sup>13</sup> Aha/ dinaki o gwo yansan ki kun tiya mini 'taki ta gi mii gun 'disha'dish abor mo dhali uma tiya mmokal to kun ditadiç mo. <sup>14</sup> Hili mmonyaka nyaç to mo, gom tom bum gun ishkin ka enthus mo shwane/ e mo yan mo tani mini 'taki thipa thip mo gom tom buni gun hara uni mo, wakan ki tom buni gun ishkin ka enthus mo tani mina uni 'taki thip um ki to gun hara um mo, wakan ki mo jin nyaç to midi di mo be. <sup>15</sup> Me'd gwo jin 'kwarkunu mo ki: A'di jin kwanyki to ki nyanye/ mo tani dara'd ki ji gi uri 'kup mo dhali a'di jin kwanyki'd ari'ceenne/ mo tani yisa hara toŋ kamuwa.

*Tiithus dhali Kum Piti kun Nyak A'di Ii mo*

<sup>16</sup> Hili ciyi mo jin 'boruwa 'bor bwa i is mo eya Arumgimis mo a'di jin karki bwa jin onu ka daran du mo mmohila hil mo gom um eya du ma Tiithus mo be. <sup>17</sup> Haali/ a'di yisa ibu'thki miij 'kup bam jin yipa amana, hili a'di ki is piti ka daran du mo tani a'di midi yaku/ i um mo ki bwam pitij gana/ mo be. <sup>18</sup> Ki a'di mo tani aman hashkina akam bana a'di jin torkina gway piti karash eya risa kaniisa 'baar mo gom gwony cim piti jin cina a'di mo gom gwom 'borga/ mo be. <sup>19</sup> Dhali hili jasi gom a'di jan yisa, hili a'di karkunu 'pen ka piye/ mo ka risa kaniisa 'baar mo mmonyak ya ki am mo gom mii ma 'the yan mo jin 'kokina aman mmokal ki mii mo gom monyca gi Tapa mo dhali mmotor bwam bam jin o'd ka daran du mo mmo/is mo be. <sup>20</sup> Am 'kona e ki mii ki 'kahar mo ki wathin tal'deñ kamu/ midi diki 'taki 'tañ manya/ apo/ am mo gom to jin ciyunu ki me'd jin 'ka'du i is mo a'di jin miikina aman to mo be. <sup>21</sup> Haali/ aman gukina a'di ki e mo a'di jin ta montak mo, yisa jasi e jis/e gi Tapa mo yisa, hili si'da/ e jis/e gi 'kwani mo be. <sup>22</sup> Dhali ki uni mo tani aman hashkina akam bam a'di jin nyo/kina aman mo me'd ka ris mo dhali gamkina aman mo ki a'di i/ona bwa ki on gana/ goma ris to 'baar mo. Dhali hili a'di shwane/ a'di ona bwa ki dhan o jin shi/ashi/ mo gom dhan miim piti jin wukina a'di um jwa i is mo be. <sup>23</sup> Haali/ me'da Tiithus mo tani a'di ita'da manpwak to bwa nyakki aha/ mo dhali agarr pem jin miiki to nyakki aha/ gom um mo. Dhali gom iwak bana mo tani uni ita imandhunu ki she/ mo eya risa kaniisa mo gom monyca ma Kristhos mo be. <sup>24</sup> Wakan nyo/i mii mo ibwambora risa kaniisa mo gom mo/en bum mo

dhali gom 'bam bam kun dhunu aman ki ca mo  
gom um mo ibwambori 'kwani gwansan mo be.

## 9

### *To jin Çinu mo gom Imandhunu ki She/ki Dhelel Dhelel mo*

<sup>1</sup> A'di yisa ta gwo jin migā/ mii i'kwar mo gom  
um mo gom to jin çinu ki me'd mo gom uni kun  
dhunu ki she/ ki dhelel dhelel mo. <sup>2</sup> Haali/ aha/  
mishkina miim bum jin iskina um mo, a'di jin  
karkika/ 'ba/ ki ca mo gom um mo ibwambori  
'Kwani gi Pam Makiduniyya mo mmo/o gwo mo ki  
'Kwani gi Pa Akaa/iya uni 'kokin mo mmothoson  
is buni mo 'peni yil kagush mo. Dhali miim bum  
jin shwa uma nyor ki thith tani a'di merki unin  
tiya is ka woho/ mo be. <sup>3</sup> Hili aha/ hashkina iwak  
mo, wakan ki 'bam bam gun dhuna aman ki ca  
mo gom um mo tani minu 'koki nyo/ ki pe'th eya  
yir yansan mo be, wakan ki um mini thoson is  
mo me'd gwo jin okika/ gom um mo jin midi 'taki  
di moyi. <sup>4</sup> Isi ciki/ wakki/ 'kwanin tiya 'peni Pam  
Makiduniyya mini pu'dku/ mo nyakki/ aha/ mo  
dhali gam um ki um 'koki thoson is mo tani aman  
minu dhu ki mon'the is mo, mmomol 'twañ kamu/  
o mo gom um mo, gom mo jin wuna aman um jwa i  
is kan mo be. <sup>5</sup> Wakan aha/toshkina ki a'di ta mii jin  
minu mii mii mo mmodhuki iwak 'pen mo mmo/  
ii mo e um mo ntwa/a/ ki aha/ mo dhali thoson  
ntwa/a/ mo gom to jin çinu ki me'd mo jin ona um  
gwo is mo, wakan ki a'di minu thoson is mo, yisa  
mmokana kan ki 'bi'th mo gom a'di mo hili ki bwa  
jin ciki to ki me'd mo be.

<sup>6</sup> 'Kup gwo a'dihe/ be. A'di jin siki to ki gwa'd gwa'd mo tani a'di si'da/ midi 'cith to jin gwa'dagwa'd mo dhali a'di jin siki to ka entus mo tani a'di si'da/ midi 'cith to ka entus mo be. <sup>7</sup> Aris 'kwani 'baar ka 'dete/ 'dete/ mo mini mii to gun dhukina uni eya dum buni mo, yisa ki is jin irinqunu mo walla ki mo jin rukunykunuwa rukuny mo haali/ Arumgimis enki uni gun ci to ka 'ka'd me'di is mo be. <sup>8</sup> Dhali Arumgimis mishi um te mo ka ris mom'bor mii e mo jin isha to ka entus mo be. Wakan ki um isa yempa/ takin gi to jin 'koshi jwa mo 'pena ris to 'baar mo dhali wakan si'da/ um mini te aris mii gun ishin ka entus goma ris miim 'borga/ mo be. <sup>9</sup> Me'd gwo jin 'kwarkunu mo ki:

A'di yekki to mo isa dhana/ mo, a'di ciki to mo gom uni gun hatha'ko'd mo.

Momii ma kar/em piti a'di 'dimki 'kup mo gom mii jin 'konu ki sule/ mo be.

<sup>10</sup> A'di jin ciki'da ka'bany to ka mansi to mo dhali ton te/ goma manshwa to mo tani a'di midi thipa thip mo dhali mara ka'bany bum is mo dhali ganan mondhe'd bum jin ta mii ma kar/e mo be.

<sup>11</sup> Dhali um minu saka'th mo eya ris bwayi 'baar mo ki 'twaŋkal kuku/ mo gom dhan tony caaga/ kun cina um ki me'd mo, a'di jin minu wagas ki am mo gom mo jin cinu a'bor bwa i is mo goma Arumgimis mo be. <sup>12</sup> Haali/ gom mii yansan jin miikunu mo tani yisa jasi goma thip kun thipu ki to gom uni gun dhunu ki she/ gom to gun hara uni mo yisa hili si'da/ gom mo ka ris kun cinu a'bor bwa i is mo goma Arumgimis mo kun sokin ki sho'k buni mo be. <sup>13</sup> E bwaŋ'kwariny mo yansan

jin nyo/u mo gom mo jin miinu to mo tani um mini kara Arumgimis ki ca mo gom gwo jin hana um e mo mmomii mo gom monyith jin nyithkina um gwom 'borga/ ma Kristhos mo dhali gom to jin çina um ka 'ka'd me'di is mo gom uni mo dhali gom cin tiya 'baar mo si'da/. <sup>14</sup>Dhali me'd jin 'kosha kwa/a/ uni gom um mo dhali 'tho gom um mo haali/ goma 'the ma Arumgimis jin bononi mii mo jin di e um mo. <sup>15</sup>Mom'bora 'bor bwa i is mo eya Arumgimis mo gom to jin çiyunu ki me'd mo jin çina a'di mo a'di jin molu kolol mo be.

## 10

### *Mii ma Buulus jin 'Ce'dkina A'di Gwo She/ mo gom Mii jin Miina A'di To mo*

<sup>1</sup> Aha/ Buulus ki is pem lalkina um sho'k ki gwo mo ki mii ma 'thup e mo dhali mii ma du jin 'thupki'd eya Kristhos mo – Aha/ jin kara is ki gwa'd mo ki ana 'kona ka ƙarambor mo, hili aha/ dara gi monyju/ mo ki aha/ pikina 'peni um mo – <sup>2</sup>Aha/ 'thokina um ki aha/ dikina e bur'kus bum mo ki aha/ mina 'taki diki ƙor mom pem jin dika/ ki ju/ mo gom miiny jwa jin wunu i is mo me'd jin migi/ ƙora po/ kun tiya mo kun 'bapaski aman is ki mii mo kun 'dapi e ki bunjwar is ga 'cesh mo. <sup>3</sup>Haali/ ba aman 'kona e mony'cesh mo tani aman yisa ƙalkina mo/as gi mony'cesh mo. <sup>4</sup>Haali/ to gi mo/as bana 'koki ta mo ma mee gi mony'cesh jin asa ana mo, hili uni ta ku gi mom'bi'th jin piyi'd 'peni Arumgimis mo mmo'ce'da cur gi mo jin ƙenu mom'bi'th sho'k mo be. <sup>5</sup>Ana 'ce'dkina gwo jin garu 'kusi 'twa/ sho'k mo dhala ris mo jin

dhunu is ki ca mo mmo'tasha 'tash 'twa/ mo gom mo jin minu nyitha Arumgimis mo dhali budha ris gwo kun kulumkina ana i bwa mo mmodhu mo mmoha gwo ma Kristhos e mo be. <sup>6</sup> Mmonyonj is mo mmorica ris gwo gun ushu ha e mo ki gwom bum gun hakina um e kun thimkunu mo be.

<sup>7</sup> Hili a'di jin di'd e bwambori jis/em bum mo. Wakki/ jan tal 'deñ kamu/ wu'da wuny jwa i is mo ki a'di ta jim ma Kristhos mo tani dhalki a'di ka is piti e mo ki a'di ta ji ma Kristhos mo be. Wakani am si'da/ mo be. <sup>8</sup> Haali/ isi kan wakki/ aha/ kara 'ba/ ki ca mo 'teki shi/ ari nyanye/ mo gom moshirr bam mo jin çikina Tapa am mo gom mo jin nyanju um is mo dhali yisa gom mmo'ce'd um sho'k mo tani aha/ yisa minu kar ki mo ma 'the is mo. <sup>9</sup> Aha/ mina 'taki diki su'k uma du ka war moyi ki gwom pem jin 'kwarkika/ um mo be. <sup>10</sup> Haali/ uni o gwo mo ki: Gwom piti kun 'kwarkina a'di mo tani diñadit mo dhali 'bitha'bi'th mo, hili mo jin dina a'di e bun'kus is mo tani 'ka'da'ka'd mo dhali gwom piti jin ona a'di mo tani wañu mo be. <sup>11</sup> Dhalki 'kwani gi wakan mish gwo 'ban mo ki gwo gun ona aman e gwo kun 'kwaru mo me'd jin pina aman mo tani aman miikina a'di me'd jin 'kokina aman mo be. <sup>12</sup> Yisa mmomiina aman ka gugundhi/ mmodhu is bam ka par nyakki unin tiya gwansan kun dhuki is buni ki ku gun ha me'd mo. Hili ki uni barki is buniñ gana/ ki tiyan tiya mo tani dhali dhu is buni ka par mo ka rem 'kup mo tani uni dar gi gwo jin mishu 'ban mo be.

<sup>13</sup> Hili aman mina 'koki dhu is ki ca mo mmo'ce'd gwayu/ mii apo/ mo, hili aman mina dhu gwayu/ ma Arumgimis mo a'di jin dherkina a'di aman mo

mmojidhir mo isi kan e umi. <sup>14</sup> Haali/ aman ki is bam yisa 'ce'dkina agagala/ mo, ma me'd jin dina aman ki jithirku/ i um mo. Aman takina uni kun ṭwa/a/ mo kun pu'dkin 'peni bway jin si'dasi'd e um mo gom gwom 'borga/ ma Kristhos mo be. <sup>15</sup> Aman 'konaki dhu 'bam bam ki ca mo mmo'ce'd gwayu/ mii apo/ mo e mii jin miina 'kwanin tiya to mo. Hili mo ma 'teŋ kapem bam a'dan be. Ki mongam gwo is bum minu ek mo tani bwam mondhe'd bam e bwam um mo minu galal ki galal jin caaca mo be. <sup>16</sup> Wakan ki am mina 'taki ci gwom 'borga/ eya ris bampa/ 'baar mo mmo'ce'd uma po/ mo ki dar gi mii jin dhunu 'ba/ ki ca mo gom mii jin iskin hila/ mo e bwam mondhe'd gi cin tiya mo be. <sup>17</sup> Dhalki a'di jin kar 'ba/ ki ca mo tani kar 'ba/ ki ca mo e Tapa mo be. <sup>18</sup> Haali/ a'di yisa ta wathi/ jin midi kar is piti ki ji gi ha me'd mo jin minu bu'th mo, hili wathi/ a'di imina Tapa kar ki ji gi ha me'd mo be.

## 11

*ABuulus dhalí ku gi Ta Thus ki Thus mo kun Dhunu ki She/mo*

<sup>1</sup> Aha/ onayi ki um mini dhal aha/ ari bway mo mmo/o ari gwom pus mo. 'Kuçi bwa mo ma ki 'kari'th gom aha/ mo. <sup>2</sup> Aha/ sura i mon'thoṭh bwa gom um mo jin piyi'd 'peni Arumgimis mo haali/ aha/doshkina um eya Kristhos mo mmoci um me'd nyaranya'b this jin dheleladhelel mo goma kath ma yim mo be. <sup>3</sup> Hili aha/ ḁo/kina is mo, me'd mii jin miina tasha/ mo mmoheka Hawwa e mo ka mak piti mo tani ki gwom bum kun kulumkina umi bwa mo tani mini sus um mmoper mo 'peni

mii gun daru gi washila/ mo dhali miin dhelelga/ kun ta mii ma gayiin eya Kristhos mo be. <sup>4</sup> Haali/ wakki/ jan tal 'deñ kamu/ midi pu'dku/ mo dhali ci gwo goma Yesusa kamu/ mo jin diki ta a'din 'de/ jin cina aman um gwo mo tani walla wakki/ um bu'th shi/in kun 'ko ki she/ mo 'peni a'din 'de/ jin butha um mo walla wakki/ um bu'th gwom 'borga/ jin di ki she/ mo 'peni a'di jin bu'thkina um mo tani um komki 'peni a'di ki jahanne/ mo be. <sup>5</sup> Aha/ tosha ki aha/ dinaki kar ari sheñ kamu/ mo gom uni gwansan kun dhunu ki she/ mo kun bolona bol e mo be. <sup>6</sup> Isi kani wakki/ aha/ dina 'twam pem ki ta gwocon mmotor gwo mo tani aha/ dara gi mo jin nyithuwa nyith mo yisa. Hili eya ris bwayi 'baar mo ki 'twaŋkal kuku/ mo tani aman torkina um a'di yansan eya tente/ eya ris to 'baar mo be.

<sup>7</sup> A/ki aha/ miikina miinthus mo mmokarka/ is pem ki gwa'd wakana ki um minu 'taki dhu ki ca mo haali/ aha/ cikina um gwo ma Arumgimis jin ta gwom 'borga/ mo ki dar gi mii jin 'thonu to 'peni um mo be. <sup>8</sup> Aha/ 'tulkina to 'pena kaniisan tiya mo mmobu'thkika/ to gun çinu 'peni uni mo goma thip jin miinuwa thip mo, ki mii gi wakan mo mmomii um to mo be. <sup>9</sup> Dhali ki aha/ nyaka di ki um mo dhali aha/ hara to mo tani aha/ dinaki kar jan tal 'deñ kamu/ ton diti'd ibwa mo haali/ tom pem jin taka/ mo tani 'kokunu mo mmothip aha/ 'pena wak mo uni gun pu'dkin mo 'peni Pam Makiduniyya mo be. Wakan aha/ tułkina is mo dhali aha/ mina isi tuł mo 'peni mo si'da/ jin 'konu ki ton ditiñ ibwa mo e um mo eya ris 'twaŋkal kuku/ mo. <sup>10</sup> Me'd gwon̄ gana/ ma Kristhos jin diki'd e aha/ mo tani 'bam pem jin karka/ ki ca mo tani

aha/ mina 'twa/ diki 'dap mo e bampa/ gi Pa A<sub>k</sub>aa/  
iya mo be. <sup>11</sup> Dhali kataye? Haali/ aha/ dinaki en  
uma? Arumgimis mishki'd ki aha/ ena um mo be.

<sup>12</sup> Dhali a'di jin miikika/ mo tani aha/ mina t<sub>ik</sub>ir  
a'di mii mo jin mig/ non uni gwansan kun se gwo  
i is mo, uni gun dhuki 'bam buni ki ca mo gom gwo  
jin hashu uni mo ki uni gun mini 'taki se gwo i is  
mo mmo/o ki uni i miiki mii mo ki mii ma garrne/  
mo me'd aman mo be. <sup>13</sup> Haali/ 'kwani gi wakan  
ta uni gun dhunu ki she/ mo gun ta thus mo dhali  
imanmiiya tu'c gun he'kkina he'k e mo, kun warki  
is buni<sub>ŋ</sub> gana/ ki uni ma Kristhos kun dhunu ki she/  
mo. <sup>14</sup> Dhali mo jin meru di'da? Haali/ isi kani  
aSe<sub>ta</sub>an warki is pitij gana/ ka man'doyu gwo gi  
monkush mo be. <sup>15</sup> Wakan a'di yisa ta to jin meru  
wakki/ c<sub>i</sub>n<sub>g</sub>kinam piti si'da/ warki is buni me'd is gi  
c<sub>i</sub>n<sub>g</sub>kina/ gi mo ma kar/e mo be. Hili 'pemen buni  
mini 'ko isi ki miim buni gun miikina uni mo be.

*Mo jin 'Kosh ma Buulus Is ka Nyor mo Me'd jin  
Tana A'di Amankaru ki She/mo*

<sup>16</sup> Aha/ rasha gwo e mo ba/. Dhalki wathin t<sub>al</sub>  
'de<sub>ŋ</sub> kamu/ midi mii diki tosh ki aha/ tana pus mo.  
Hili isi kani wa<sub>k</sub>ki/ um toshkin kan mo tani budhi  
aha/ mo ma me'd wathim pus mo, wakan ki aha/  
gara/ mina 'taki kar ari 'ba/ ki ca mo. <sup>17</sup> (A'di jin  
oka/ mo tani a'di oka/ mo yisa ki moshirr gi Tapa  
mo, hili me'd wathim pus mo mmokarkika/ 'ba/ ki  
ca mo mmowuwa wuny jwa i is mo be. <sup>18</sup> Me'd jin  
tana 'kwani aris ka ris kun dhu 'ba/ ki ca mo gom  
to ga 'cesh mo tani aha/ gara/ mina kar 'ba/ ki ca  
mo be.) <sup>19</sup> Haali/ um 'kunykina bwa mo mmo'kuç  
bwa mo gom uni gun ta pus mo me'd jin yuka um

ki yuk ki is bum mo. <sup>20</sup> Haali/ um 'kucki bwa mo wałki/ wathi/ dhu um ki ćin̄kinam piti mo, walla 'kwar um ka gwapi/ mo, walla bu'th shi/ miim 'boron bum mo, walla 'theł̄ thini mis mo, walla dor um e jis/em bum mo. <sup>21</sup> E mon'the is pem mo tani aha/ mina mii o gwo mo ki am 'kokina mo ki is jin 'ka'da'ka'd kagahara mo gom mii jan mo be.

Hili ma a'diyin jin mina jan tał 'de/ ibu'th ki moŋkar 'ba/ nycine/ mo tani – aha/ okina gwo me'd wathim pus mo – aha/ si'da/ bu'thkina mo mmokar 'ba/ ki ca mo ki a'di jan mo be. <sup>22</sup> A/uni ta 'Kwani Ibraniyyina? Wakan aha/ garayi. A/uni ta 'Kwani ma Israyiila? Wakan aha/ garayi. A/uni ta emen ma Ibrahiima? Wakan aha/ garayi. <sup>23</sup> A/uni ta ćinkina/ ma Kristhosa? Aha/ tana jan 'de/ jin 'boro'di. – Aha/ ona gwo mo me'd wathi/ jin gusi'da du mo. Aha/ tana a'di jin 'boro'd ki 'bor gana/ kagahara goma tu'c jin caaca kagahara mo dhali gom mmodi eya sijin kagahara mo dhali gom mondor jin molu den e mo dhali gom mmo'dish 'twa/ isa yempa/ mmowu mo. <sup>24</sup> Me'di mudhe'd mo aha/ bu'thkina mondor 'peni me'd gi 'Kwani Yahuuda/ mo ki mondor jin 'kona issu/ i/ ath 'de/ mo. <sup>25</sup> Me'di kwara mo aha/ dorkunu mo ki cwa mo. Ki enj kamu/ mo tani aha/ 'koshkunu ki wosh mo. Me'di kwara mo tani aha/ dikina e bwam ma kur yi'de/ jin pwathki bwa mo. Ki mon'thiny ilu/ mo dhali ki montee ilu/ mo tani aha/ hashkina e 'kułkumma/ yi'de/ mo be. <sup>26</sup> E ya jin yaka/ me'd ka ris mo, aha/ 'dapa 'kup e mo jin tagu wu mo 'peni yi'de/ kun son mo, e mo jin tagu wu mo 'peni 'kwanim pem mo, e mo jin tagu wu mo 'peni

'kwani gun 'koki ta 'Kwani Yahuuda/ mo, e mo jin tagu wu mo e 'penjuman bampa/ mo, e mo jin tagu wu mo e mombwaasho mo, e mo jin tagu wu mo e kumma/ yi'de/ mo, e mo jin tagu wu mo 'peni iwak pem gun ta thus ki thus mo, <sup>27</sup> e mii ma tu'c jin 'batha'ba'th mo, e miiny cinkina/ jin shwa'da nyor ki thith mo, e mon'thiny ka ris ki dar gi e ki ish mo, e te/ jin 'koshoda 'kosh mo dhali e yi'de/ jin bu'thki'da bu'th mo, me'd ka ris ki dar gi tonte/ mo, dhali e mon'thupga/ mo dhali ki is gana/ 'te/ mo. <sup>28</sup> Dhali ki dar gi mii gwansani 'baar mo ka po/ mo tani to di'd jin yap aha/ mo isa yempa/ mo, a'di jin ta mo/anan is pem goma risa kaniisa 'baar mo be. <sup>29</sup> Kaja a'di 'ka'da ise idhali aha/ idina is ki 'ka'd mo? Kaja a'di jin karu mmobit moye idhali aha/ idin ma nyor ki dek mo?

<sup>30</sup> Wakki/ aha/ mina mii kar 'ba/ ki ca mo tani aha/ mina kar 'ba/ ki ca mo gom to gun toru aha/ e mon'ka'd is pem mo be. <sup>31</sup> Arumgimis dhali Ababa gi Tapa Yesus mo tani a'di jin 'boru mii mo gom mii ma sule/ mo tani a'di mishki'd ki aha/ dinaki ta tor mo be. <sup>32</sup> E Pan Dimashk mo tani amudhiir jin diki'd e bwaj'kwariny ma Malik jin ta'da Aretha mo, jin jiki 'penjuman Bampa/ gi Pan Dimashk mo jin mina a'di bu'th aha/ mo be. <sup>33</sup> Hili aha/ thulkunu ka 'cesh mo e bwam ma nura/ mo gi ej 'kup gi embul shu'd ma goj mo dhali ye 'peni me'd piti mo be.

## 12

*Tonyjan ma Buulus mo dhali Gwo jin 'Ceenu mo*

<sup>1</sup> Aha/ mina mii kar 'ba/ ki ca mo. Toj kamu/ yisa di'd jin midi ta shi/ miim 'boro'd gom a'di mo

tani hili aha/ mina yip 'kup e tonyjan mo dhali gwo jin 'ceenu jin ta ji gi Tapa mo be. <sup>2</sup> Aha/ misha wathi/ jin diki'd eya Kristhos mo, a'di jin diki'd ki yil ḫarpa'c ath 'de/ mo 'thissa/, a'di jin bu'thkunu mo e bwam momis jin 'kon ma po/i kwara mo – wakki/ ki bunjwar is mo walla ki dar gi bunjwar is mo tani aha/ dinaki mish mo mo. Arumgimis a'di mishki mo mo be. <sup>3</sup> Dhali aha/ misha ki wathi/ yansan a'di bu'thkunu mo e bwam monyjaro/ ma Arumgimis mo – wakki/ a'di e bunjwar is mo walla ki dar gi bunjwar is mo tani aha/ dinaki mish mo mo. Arumgimis a'di mishki mo mo be. <sup>4</sup> Dhali a'di cikki gwo ki to gun minu mol tor mo, jin mina wathi/ mol bah mo be. <sup>5</sup> Gom gway gi wathi/ yansan mo tani aha/ mina kar 'ba/ ki ca mo, hili eya po/ gway gi is pem gana/ mo tani aha/ mina diki kar 'ba/ki ca mo isi ciki/ jasi moŋ'ka'd is pem mo be. <sup>6</sup> Ba wakki/ aha/ onayi ki kar 'ba/ ki ca mo tani aha/ mina diki ta pus mo haali/ gwo jin miga/ tor mo tani midi ta gwoŋ gana/ mo be. Hili aha/ tu'kkina is mo 'peni a'di mo, wakan ki jan tal 'deŋ kamu/ midi 'taki diki kulum gwo apo/ aha/ ki nyanye/ 'peni a'di jin parkina a'di e e aha/ mo walla cik 'peni aha/ mo be. <sup>7</sup> Dhali mmonon aha/ 'peni mo jin miga/ kar 'ba/ki ca mo goma ris gwony'cee gwansan kun ishkin ka entus mo tani a'de/ a'di cikunu aha/ mo e bunjwar is pem mo a'di jin ta'da gumbway ma Setaan mo mmotukun aha/ mo, mmonon aha/ mo 'peni mo jin miga/ 'taki kar 'ba/ ki ca ki nyanye/ mo. <sup>8</sup> Me'di kwara mo tani aha/ yukkina Tapa mo mmo'tho mo gom a'di yan mo ki a'di midi 'taki dhal aha/ mo. <sup>9</sup> Hili a'di ki o aha/ gwo mo ki: A'them pem a'di

'koshi jwa mo gom /e mo haali/ mom'bi'th pem a'di  
 nyo/u mo ki nyo/ gana/ e mo is jin 'ka'da'ka'd mo.  
 Aha/ mina bwa 'kuny ki nyanye/ kagahara 'baar  
 mo mmokar 'ba/ ki ca mo e mom pem kun 'ka'dka/  
 is mo ki mom'bi'th ma Kristhos midi ç'a'ba po/ aha/  
 mo be. <sup>10</sup> Gom gway ma Kristhos kan mo tani aha/  
 ç'a'bkin ka this mo i e mo e is jin 'ka'da'ka'd mo,  
 eya waƙ jin waƙu mo, e miiny çinjkina/ jin shwa'da  
 nyor ki thith mo, e mo gun tojuwa to'c bwa mo,  
 dhali e mii ma cis mo. Haali/ ki aha/ 'ka'da is kan  
 mo tani aha/ 'bi'thkina is ki 'bi'th mo be.

*Mo jin Anankin ma Buulus Is mo goma Kaniisa gi  
 Pan Kurinthuuus mo*

<sup>11</sup> Aha/ takina pus mo. Um kankaa/ ki 'bi'th mo  
 gom a'di mo haali/ aha/ ka ba/ imina 'taki ha me'd  
 ki hanj gana/ ki um mo. Haali/ aha/ dinaki kar ari  
 shej kamu/ mo gom uni gwansan kun dhunu ki  
 she/ mo kun bolona bol e mo, isi kani ba aha/ tana  
 tonj kamuwa. <sup>12</sup> Jamas mii goma mankaru ki she/  
 jin ta jin gana/ mo tani uni thimkunu mo e bwam  
 um mo eya ris bwa 'baar mo kun 'kuçkunu mo ki  
 'kari'th mo dhali ki jamas mii mo dhali ki momer  
 mo dhali ki miiny caaga/ mo. <sup>13</sup> Haali/ 'peni shi/  
 miim 'boro'd jana nonu um mo jin tan ma kaniisan  
 tiya mo, isi ciki/ aha/ ki is pem dinaki kar tonditj'da  
 po/ um mo. Dhalki aha/ 'peni mii yan jin thu'thka/  
 mo ma.

<sup>14</sup> Mmahan gom me'd kun 'koni kwara mo tani  
 aha/ thosonkina is pem mo mmoyaku/ i um mo.  
 Dhali aha/ mina dit um mii ki dit yisa, haali/ aha/  
 dinaki simm to gun tana um e mo, hili aha/ simma  
 jasi um e mo. Haali/ ushi uçi ƙa ba/ imini 'koki  
 mii dhu to mo gom icom buni mo, hili icom gom

ucim buni mo be. <sup>15</sup> Aha/ mina bwa 'kuny mo ki 'kuny gana/ mo mmo'baar tom pem mo dhali mmo'baaru is pem mo gom gway ma ḫashiram bum mo. Wa᷑ki/ aha/ ena um kagahara mo tani a/ dhali aha/ minu en ki gwa'd gwa'd mowa? <sup>16</sup> Hili 'boro'd be ki aha/ ki is pem dinaki di᷑t um mii ki di᷑t mo. Dhali um o gwo mo ki aha/ miikina ka mak̑ mo dhali aha/ he'kkina um e mo ka gany pem mo. <sup>17</sup> A/aha/ bu'thkina shi/ miim 'boro'd 'peni um ki unin tiya gwan gun hashkika/ e um mowa? <sup>18</sup> Aha/ ḫankina Tiithus gwo mo mmoyaku/ mo dhali mmohasha kam mmonyaq̑ ya ki a'di mo. A/dhala Tiithus bu'thki shi/ miim 'boro'd 'peni um mowa? A/kona am ki mii mii jin nyaka'd e shi/ ina 'de/ mowa? A/kona aman ki nyak̑ ḥnatgin gun nyak̑kan mowa?

<sup>19</sup> A/ um 'kon mmotosh isa yempa/ ki aman 'ce'dkina gwo she/ mo gom bungwar is bam mo ibwambori um mowa? A'di ibwambori jis/e ma Arumgimis mo ba/ ki aman ṭorkina gwo goma Kristhos mo dhali a'di 'baar mo gom mmonyan bum kun minu nyaj̑ um is mo, um gun enu mo be. <sup>20</sup> Haali/ aha/ ko/kina is mo ki aha/ wari mina 'taki pu'dku/ mo dhali gam um me'd jin dika/ ki o bwayi, dhali ki um mini 'taki gam aha/ me'd jin mina um i'koki o bwa moyi. Wakan wari ki mo jin waluwa wal midi di mo walla bwan dhapan mo walla mo ma nyor mo walla mii jin miinu ka ham 'kus mo walla mo jin thudhuwa thu'th 'pen mo walla mo ma le'd jin tanu mo walla mo jin 'theku 'ba/ mmis mo walla mo ma dulatt̑ jin miinu mo. <sup>21</sup> Aha/ ko/kina is mo ki me'd jin migā/ pu'dku/ mo dok̑/e mo tani Arumgimis pem a'di midi 'taki kar

aha/ ki is jin gwa'da'd mo ibwambori um mo dhali  
 aha/ mina 'taki mii ko mo goma ris uni gwansan  
 kun miiki miinthus i<sub>t</sub>wa/a/ mo dhali 'koki rica du  
 is mo 'peni mon'dap em buni mo dhali mii gun  
 miinu miinyçal mo dhali mii kun 'kanuwa ɻanthi/  
 mo, a'di jin botkina uni mo mmomii mo be.

## 13

*Kwalany 'Te/ be. Gwo jin Rumkunuwa Rum mo  
 dhali Monthe Me'd mo*

<sup>1</sup> Yansan ta me'di kwara mo jin murka/ pu'dku/  
 i um mo. E mii gunn kun yera yer is ki gway mo  
 tani minu mii ɻe mo ki te'b ki 'twaŋ 'kwani su/  
 mo walla ki 'twaŋ 'kwani ikwara mo kun mini mii  
 ta iman/o gwo mo. <sup>2</sup> Aha/ rumkina uni gwansan  
 kun mii miinthus n<sub>t</sub>wa/a/ ki gwo mo dhali aris  
 unin tiya si'da/ mo, dhali aha/ rumkina uni ki gwo  
 mo shwane/ me'd jin pikika/ mo me'd jin miikika/  
 mo ki aha/ dikina i bun'kus mo eya pom bu<sub>t</sub> pem  
 jin 'kon ma po/i su/ mo ki aha/ mina diki 'tash  
 uni 'twa/ mo wakki/ aha/ mina pu'dku/ dok/e mo  
<sup>3</sup> haali/ um 'kokina gwo ibwa mo mmonyo/ mii mo  
 ka Krishhos a'di torki gwo e aha/ mo. A'di yisa 'ka'da  
 is ki 'ka'da e mo jin tu'ba a'di um mo, hili a'di ta gi  
 mom'bi'th e um mo be. <sup>4</sup> Haali/ a'di 'koshkunu jwa  
 mo ki cwany'cithan dhul mo e mo jin 'ka'da a'di is  
 ki 'ka'd mo, hili a'di di'd ki e mo dok/e ki mom'bi'th  
 ma Arumgimis mo. Haali/ aman 'ka'da is e a'di mo,  
 hili mo jin tu'bu/ um mo tani aman mina nyak 'ko  
 ki a'di mo ki mom 'bi'th ma Arumgimis mo be.

<sup>5</sup> Nyithi/ is bum mo ma, mmopar e wakki/ um  
 shurkin mo e mongam gwo is bum mo. Pali is bum  
 mo ma. 'Kona um ki nyitha ka Yesus Krishhos a'di

diki'd e um mo – isi ciki/ ka jin̄ gana/ um ushki me'd mo mmogam mompal 'kup mo be. <sup>6</sup> Aha/ ona bwayi ki um mini gam gwo ki aman 'konaki ta ku gun ush me'd mo be. <sup>7</sup> Hili aman 'thokina Arumgimis mo ki um mini 'koki mii a'di jin ta thus ki thus mo – yisa ki aman wana e gi uni gun gam mompal 'kup mo 'te/, hili ki um mini mii a'di jin ta jin̄ kar/e mo, ba am a'di iwana e ki uni gun ushi me'd mo be. <sup>8</sup> Haali/ aman mina mol toŋ̄ kamu/ mii apo/ gwoŋ̄ gana/ mo, hili jasi gom gwoŋ̄ gana/ mo be. <sup>9</sup> Haali/ aman 'kunykina bwa mo ki aman 'ka'dkina is mo dhali um a'di i'b'i'thkin ki 'bi'th mo. A'di jin 'thokina am mo tani ta gom miim bum jin minu nyo/ shoka 'cesh mo be. <sup>10</sup> Aha/ 'kwarkina gwo yansan ki aha/ si'da 'peni um mo, ki mii gi wakan ki aha/ mina pu'dku/ mo tani aha/ mina diki mii o gwo jin 'bitha'bi'th mo mmobu'thka/ moshirr mo a'di jin cikina Tapa aha/ mo gom mo jin̄ nyaŋ̄uwa nyaŋ̄ is mo dhali yisa mmopor to bwa mo.

<sup>11</sup> Kwalany 'te/ ba/, iwak̄ mo. 'Koku/ ma. Toki miim bum ma. Ciya hirdhe/ ki gwom pem mo ma. Gami gwo me'd ka rem 'kup mo ma. 'Koyi e mon̄ku'th is mo ma. Dhali Arumgimis gi mo/en dhali ji gi mon̄ku'th is mo a'di midi di e um mo be. <sup>12</sup> Theka the me'd ka rem 'kup mo ma ki 'twa/ jin̄ kogu jin̄ pinu mo. <sup>13</sup> Aris uni 'baar mo kun dhunu ki she/ ki dhelel dhelel mo tani theki um me'd mo be.

<sup>14</sup> A'the gi Tapa Yesus Kristhos mo dhali mo/en ma Arumgimis mo dhali anyak̄ jin̄ nyakku to mii gi Shi/in Dheleladhelel mo tani mini 'ko e umi 'baar mo be.

## **Gwo Ma Arumgimis Uduk New Testament and OT Portions**

copyright © 2005 SIM International

Language: Uduk

Translation by: SIM International

### **Uduk New Testament and OT Portions**

Published by Bible Alliance Mission, 1983.

. If you are interested in obtaining a printed copy, please contact the SIM at [www.sim.org](http://www.sim.org).

. This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-10-02

---

PDF generated using Haiola and XeLaTeX on 11 Nov 2022 from source files dated 29 Jan 2022

f734434c-b6bd-5d21-abc6-692c3842e034